

Wan aber nuhn die Kinstöck gedertt seindt / so soll der derrer die thür mitt diser weiß wie ich gesagt hab auff heben / auch den riegel mitt dem schlackenhacken in sein handt habe gschlossen / auß dem loch der rechten mauren / in das loch der lincken ziehen / vnd darnon widerumb gezogen / an sein ort thün / als dan sol der derrer vnd garmacher die Kinstöck / so gegen über außziehen / bald von den ziegien die Kinstöck herab ziehen. Aber ein jetlicher hacken soll zweyer spannen hoch sein / auch so viel quärfinger breit / ein quärfinger dick / sein eiserner stil sol zwen werckschüh lang sein / der hülzin eilff. Es seindt auch jnen frail mitt zweyen zacken / mitt welchen die gederten stuck herauß zogen / zu der lincken seitten gezogen werden / daß sie mitt der zangen gefast werden mögen: ihre zacken solen spitz sein / zweyer spannen hoch / vnd so viel quärfinger breit / ein quärfinger dick. Deren teil des stils soll von eisen sein / eines werckschüchs lang / der hülzin teil neun werckschüh lang. Die gedertē stuck von den derrern vñ helffer knechtē von dē herdt genömen / so andere mitt den zangē fassendt / in dē gfiertē wasser trog vollen wassers werffendt / welcher zeng zwen werckschüh vnd dreyer spannen lang seye. Sein beider stil soll ront sein / dicker dan ein quärfinger / am hilt deren teil an der seitten seiger gericht einer spanen vnd zwen quärfinger herfür ghen / beide schere seye andert halben quärfinger dauornen breit vnd scharpff / dahinden eines quärfingers dick / als dan nach vnd nach dünner. Dise so sie zusamen ghendt / soll der hole teil zweyer spannen / vnd so viel quärfinger breit sein. Aber die gederten stuck / die vom kupffer herab fließendt / die sollen nicht von stundt an in den wassertrog geworffen sein / darumb daß sie zerspringē / vñ ein klapff wie ein donnerschlag vorn gebendt / eben dise stuck sollen widerumb auß dem wassertrog von dē arbeitern die auff zweye brettern sthendt / so in die quär gelegt / mitt der zangen herauß gezogen werden / dan je belder sie darauß genömen seindt / je leichter von jnen das kupffer / das ein grauwe farb hatt an sich gezogen / abgeschlagen wirt. Zulest soll der derrer mitt dem stoßeisen die eisernen ziegel so noch warm / von dem herdt ein wenig heben / diß soll einer spannen vnd zwen quärfinger lang sein / vnden scharpff vnd einer spanne vñ quärfinger breit / oben einer spannen gegen dem stil soll es ront ist /

welchs teil eiser sey / zweier werckschüh lang / der hülzern aber sieben werckschüh vnd ein halben.

Die thür so auffgehept A. Der hacken B. Die frail mit zweyen zacken C. Die zang D. Der wäschtrug C.

Am